

四庫全書

集部

欽定四庫全書

集部

古今禪藻集卷二十一

詳校官庶吉士 臣謝恭銘

主事銜 臣徐以坤覆勘

總校官庶吉士 臣倉聖脉

校對官原任編修 臣勵守謙

騰錄監生 臣任嘉春

欽定四庫全書

古今禪藻集卷二十

明釋正勉釋性通同輯

明

七言古詩

高皇躬率舟師至鎮江浮子門受降偽吳旋師駐
蒜山下幸拱真庵賦此以獻

常欽

天人西來乘赤龍手握寶劍青芙蓉出師百萬皆英雄
四方上下雲相從大船椎鼓聲雷同斬蛟射鯨滄海中

須臾日出扶桑東波平浪息天無風歸來奏凱登九重
斯民有賴歌年豐祝皇壽比南山崇邦基永永傳
無窮

君子交行贈呂日新

梵琦四首

君不見車輪碾地不碾塵塵暗却遮車上人又不見馬
口吸泉不吸月月明豈解心中渴所以君子交毋為小
人絕

海東青行

海東青高麗獻之天子庭萬人却立不敢晚玉爪金眸
鐵作翎心在寒空鞴在手一生自獵知無侶孤飛直出
大鵬前猛志豈落鴛鴦後是日霜風何粟冽長楊樹羽
看騰瞥奔雲突霧入紫霄狡兔妖蕞灑丹血束身歸來
如木雞衆鶻欲並功難齊爾輩無材空碌碌不應但費
官厨肉

春日花下聽彈琵琶效醉翁體

僕本南海人暫為北京客朝遊金張園暮宿許史宅二

月春風吹百花朱朱粉粉相鉤加銀鞍繡勒少年子對
花下馬彈琵琶大絃掩抑花始開花重墜枝枝更斜小
絃變作花爛漫雨點驟打烟濃遮鷓鴣從何來遠在天
之涯鉤輒格磔忽驚起不知飛在誰人家又聞黃鸝聲
覩眈如斷復續續復斷布指似嫌宮調緩別寫羣鴈鳴
霜暖蒹葭浦深風蕭颯一隻兩隻飛漸高天長地遠望
不見使我回首心煩勞我謂少年彈且止錢塘去國三
千里每到春來花最多鷓鴣能舞黃鸝歌去年隨鴈同

沙漠聽此琵琶殊不樂少年笑我君太癡人生行樂須
其時此中正自有佳處但畏閒愁纏繞之

北邙行

請君停一觴聽我歌北邙北邙在何許乃在洛之陽洛
陽城中千萬家無有一家免亂亡天地開闢來死者生
之常遠如上古諸皇帝卒棄四海歸山岡富貴浮雲亦
易滅筋骸化土誠堪傷漢陵發掘竟何事後世更留珠
玉裝而況將軍墳不為荆杞荒野火燒林斷碑碣牧童

見草呼牛羊當其得志時直欲凌雲翔天子不敢忤羣
臣非鴈行嬌兒聰明尚貴主愛女秀麗專椒房昨日鑄
印大如斗今日臨軒封作王風雷起掌握瓦礫含輝光
權勢有時盡亂衰無處讓嬌兒愛女替不得點點血淚
沾衣裳白馬素車出門去未知魂魄遊何鄉土梟飛來
樹裊裊石獸對立烟蒼蒼萬歲千秋共一盡高堂大宅
空相望

題米南宮雲山圖

來復
六首

南宮米散生殊方馳名畫史妙莫當墨雲翻空太陰黑
功奪造化開微茫酒酣放筆情爛漫愛寫長林帶溪岸
崑崙移得毫芒間數點浮雲落天半鴨嘴灘頭沙浦通
鯉魚浪颭苔花風山腰路險不可履飛瀑倒掛青天虹
我憶南遊邈湘沔七十二峯長對面赤壁山高看洞庭
一道澄波瀉秋練人生誰無丘壑懷可奈塵土羈長才
子陵不遇劉文叔釣臺未必高雲臺展圖頗識舊行處
彷彿微鐘隔烟樹荒盡菱租老未歸寄書欲問沙頭鷺

秦淮謠送鄭太守歸光州石盤山

金陵古帝州山水天下壯大江九道通秦淮白頭浪蹴
桃花漲一葦不可抗倒浸鍾山青虎石何崔嵬高壓長
干城年年送人此離別官柳條青幾回折冥鴻望斷三
山烟重到憐君頭似雪呼酒鳳凰臺解君金荔枝人生
富貴豈不樂角巾歸里今奚為北渡秦淮水西登石盤
山黃鶴招欲來心與雲俱閒草堂只在青松裏大兒將
車小兒喜斑斕舞綵春當筵斫鱸雕盤奉雙鯉我歌秦

淮謠送君長淮歸乞得閒身謝明主千金不換秋荷衣
莫笑囊無錢留取百篇詩他年太史傳循吏觀風載誦
甘棠詞

遊遊方丈歌為劉嗣庭賦

吾愛淮南王種桂小山裏日與八公徒虛遊閒遁世今
是淮南孫束書不謁諸侯門東望蓬萊覓方丈扶搖欲
駕天池鷗秀眉長身髮如漆驚座高談頗竒逸浩然俊
氣橫清秋窮途懶屈黃金膝弱水豈無路飛仙邈難期

蛻骨果有術富貴將焉為男兒胸次隘八區託身何處
山巖居但令忘世即嘉遊漫遊天地皆蘧廬朝揖洪崖
君暮接浮丘伯挂劍扶桑枝種玉藍田石時人不識烟
霞蹤南征北走如旋蓬九市滾滾炎埃紅白雲半間誰
與同我有十笏地蒼藟園香風乃在天竺飛來之鷲峯
斯當掃月渡雙澗金波別種金夫容燕坐獅子牀篝燈
聽微鐘願洗玻璃酌甘露散花三繞毘耶翁

漁樂圖為茅指揮題

漁郎家住鷓鴣灣水雲千頃茅三間太平身不識官府
只將網罟營朝餐大兒扳罾露兩膊小兒鳴櫓垂雙鬢
烟波托命作畝畝蒲葦不怕風雨寒東泛白蘋渚西泊
黃蘆灘水邊長覓鷗鷺伴天上那識鸚鵡班得魚歸來
慰妻子收拾絲綸坐蓬底菱租剩有輸官錢沽酒街頭
糴新米紫螯黃金螯白鯽丹砂尾錯襟羅盤餐交歡聚
鄰里有身誰無衣食謀昨日紅顏今白頭銅駝陌上車
如流擾擾塵土何時休我愛嚴子陵脫身如老鶴釣雪

桐江臺高情付寥廓人生胡為困羈縛對此新圖壑扁舟弄月歌滄浪誰似漁家有真樂

赤壁圖為胡允中賦

江空水落寒無波倚天赤壁高嵯峨雪堂老蘇從二客攜酒夜載扁舟過中流扣舷發棹歌有酒不飲當如何鱖魚三尺鱠白雪臨風細酌金叵羅酒酣耳熱歌再起直遡空明三百里一聲孤鶴橫江來明月在天天在水
酌月呼嫦娥仰天聽天語洞簫吹徹廣寒秋却挾飛仙

共高舉人生行樂須及時昨日少壯今日衰功名自昔
等炊黍英雄徒為曹瞞悲畫史獨何心丹青托千載江
雲山月想登臨彷彿圖中見風采後來遊賞豈乏賢文
章不如元祐前萬金詞賦爛星斗追逐騷雅光聯翩先
生別去陵谷遷漠漠宇宙迷荒烟臨臯鶴夢骨可仙誰
同此樂消閒年

題廬陵王子嘉古城讀書處

古城陰處饒古木古城城下烟水綠江上茅堂畫掩扉

知是先生讀書屋先生山澤列仙癯篋無黃金家有書
燈火辛勤三十載添得秋霜生鬢鬚清晨起待簷光白
暮讀陳編眼如月堅心自下董生帷兀坐忘穿管寧榻
平生學邁師古人不負堂堂八尺身多病豈堪金帶繫
歸來獨釣碧溪春富貴浮雲我何有不如相遇一杯酒
古城山色年年青春風多種門前柳

送演南宗歸四明兼簡見心

萬金

故人昔載游吳中珊瑚文采驚諸公故人今住雙峯寺

四海象龍方競至演也昂昂才出羣入室有語曾親聞
驂騑駛裏日千里孰比凡馬徒紛紜去年渡江秋已暮
武林山空不肯住南湖十月霜雪繁挂錫還依雪深處
芝蘭玉樹三弟昆黃卷青燈幾寒暑二難中間有季方
五常白眉應最良蒹葭無由得並倚棠棣自可相輝光
春風浩蕩古澤國花發城南映城北聽鶯誰遣杜鵑啼
折柳更憐芳草色客衣飄飄何所之故山薇蕨令人思
跋涉長途善自保陞堂為道同襟期

桂之樹行

宗泐 十五首

桂之樹桂生一何偏兩株分立於庭前西株顛顛東株
妍桂之樹桂生一何蠢西株方來采其榮東株又復無
人顧桂兮桂兮非汝憐縱觀萬事無不然武安堂上席
方暖魏其門前秋草芊莫道榮枯長異勢從來反覆無
根蒂高歌感激君不聽請君試看庭前桂

隴頭水

隴樹蒼蒼隴坂長征人隴上迴望鄉停車立馬不能去

況復隴水驚斷腸誰言此水源無極盡是征人流淚積
拔劍斫斷令不流莫教惹動征人愁水聲不斷愁還起
淚下還滴東流水封書和淚付東流為我殷勤達鄉里

風入松

高堂初宵山月門長松颼颼奏清聲清聲希微坐獨聽
援琴細意寫得成調絃轉軫聲方起忽覺松風生繞指
更深鬼哭巖前雲夜半龍吟澤中水一彈一奏聲緩促
有似松風時斷續含商流徵清復哀能使幽人聽不足

卷二十一
聽不足琴忽罷此時寂寂松无風明月滿天涼露下

春江曲

春江沉沉春水滿柳條拂水蒲芽短鴛鴦睡美不畏人
日色遲遲素沙暖

苦寒行

祝融峯南三尺雪黃河到底頑水結洛陽賈客船拖膠
長安公卿馬蹄裂人言富貴即可避貧賤從來不相棄
昨夜樹頭風簌簌東家孤子號天哭

寄遠曲

美人別時春尚早清池坐見芙蓉老
湘江水滿鷓鴣飛
夢中歷歷相逢道黃金可變石可移
此心皎皎終不欺

墓上華

墓上華開滿枝行人看花行為遲
行人有恨花不知不生名園使人愛
却生墓上令人哀誰家此墓臨古道
寒食無人來祭掃莫是東君惜無主
遣此閒花伴幽兆聊持一杯酒酌爾
泉下客今日此花開正好但恐明日花

狼藉人生似花能幾時古人今人皆可悲

潭府四暢亭

讀古書彈古琴一亭風月開清襟臨池洗硯寫新句玉
壺旨酒時一斟如此四暢載登載臨美哉修身治國上
順君父足以大暢吾王之心梁園詠雪多士如林河間
禮樂和樂且耽既不泥乎聲色亦不縱乎田禽此亭燕
坐自朝夕亭前花木春陰陰衡山高湘水深天長地久
揚德音

道傍屋

道傍誰家有古屋主人不在行人宿門戶蕭條四壁空
野草依然映階綠春燕歸來細相認繞屋低飛疑不定
徒令獨客久咨嗟無復高堂樂繁盛一從兵火照坤維
十家九家無子遺願留此屋行人宿莫問主人歸不
歸

東臯老人歌

東臯老人七十餘眼明能讀細字書年來不肯城郭住

無事只愛東臯居東臯所居良不俗松竹桑榆翠園屋
前畦後圃花相映滿眼兒孫美如玉老人心中樂閒曠
時時倚杖東臯上烏紗側裡酒半酣目送飛雲度青嶂
吾知老人與世違東臯幽處無是非吁嗟休迫何所為
世間富貴多危機

阻風行

黃蘆獵獵江浩浩洪濤簸天昏復曉一日行舟兩日留
上水風多下水少未出門時思遠道在路還思在家好

坐看鴻鴈去遙遙却笑人生不如鳥

墨竹歌

魏公文章妙天下世稱善書兼善畫松雪高齋秋氣清
照眼琅玕入模寫一竿秀出何瀟灑美人獨立疎而野
九疑雲老楚江寒翠蓋臨風為誰把

度關壠

隴頭流水關山月色淒涼水嗚咽今古征人盡斷腸
野客經過亦愁絕連林二月水不開猛虎一吼蒼崖裂

鸚鵡能言好寄書心事茫茫向誰說

淮之水送別

淮之水向東流水流只載行人舟舟行如飛水如射一日可到吳江頭何不載此離情去擲向天涯不知處濠梁有客今白頭望斷孤雲海天暮

秋鶯歌

千林入秋露氣清林中尚有黃鶯聲似與羣蟬爭意氣東林飛過西林鳴向來春風花滿城柳條拂地如長纓

綿綿蠻蠻斷復續千人萬人側耳聽高樓半醉客閣牋
停吹笙白馬貴公子挾彈不敢驚此時胡為不喜聽奈
何節序移人情只合深藏緘爾口亦有妬爾金衣明反
舌無聲良久伯勞布穀俱潛形秋罵秋罵爾能翩然
入幽谷老翁歌詩送爾便覺心和平

雙桂菴

德然

颺颺西風動林麓炎蒸散盡秋氣肅嫦娥開却蟾宮門
當場撒出雙金粟漫空積地盈四簷靈葩不許羣芳妍

道人久住忘處所直疑此境是先天昔年山谷不知此
却恨晦堂無直指鼻端驀地來香風飄飄餘馨襲談塵
于今雙桂兮為名索我再歌兮奚憑晝寥寥兮花鳥無
聲夜寂寂兮月落空庭

雪蓬圖為蔡子堅賦

妙聲 二首

木蘭為舟寬可宅團團中虛室生白朔風吹雪著孤蓬
表裏皜然同一色中流蕩槳揚素波吳兒自能小海歌
酒酣恍如天上坐洪濤只尺通銀河雪蓬雪蓬奈爾何

南宗演上人歸定水寺賦詩為別就簡見心

豫章老禪天下士今既無雙古無比十年不見怨飛鴻
幾度相思隔江水前年有書到空谷放在牀頭百回讀
至今散帙眼忽明時復看雲淚相續上人新自浙東來
曾侍生公說法臺洼水本生天馬種鄧林還有豫章材
春雨相逢又相別明日扁舟異吳越君到山中問我時
為言舌在頭如雪

南翔寺次韻

溥洽

寺在吳郡天監中里人掘地得石徑丈時有二鶴集上僧得齊即其地建刹後鶴去不返俄詩見石上云白鶴南翔去不歸故名至唐有僧行齊來新舊業復有二鶴翔集焉

白鶴南翔何日返香雲不斷春風轉屋為鱗次枕江安
江作蛇行到門遠的的明燈金殿寒沉沉複道長廊晚
老翁矍鑠皎鬚眉愛客將迎笑盈面自言天監拓基來
食指數千猶共飯斷碑壁下試摩挲龜趺剝落生苔蘚
茫茫往事比寒潮蒼烟落日愁難遣就中何處愜深游
玉甃清池開別院二齋已去老堪徂故壘空來舊巢燕

吾宗有弟知此懷炊黍功名豈榮願便呼阿買寫新詩
硯池澀擁清水片

碧梧翠竹堂

良琦 二首

碧桐翠竹之高堂迺在玉山西石岡濃陰晝護白日靜
翠氣夜合清秋涼堂中美人雙鳴璫不獨癡絕能文章
北海李生共放曠東林慧遠同徜徉張騫乘槎下銀潢
奉詔遠降天妃香帷中靈風神欲語壇上五色星垂光
舟迴鯨濤遡長江故人宛在江中央入門相見各青眼

花間促席飛霞觴清歌遏雲錦瑟張亦有衆賓相頡頏
襴衡賦就故驚座寬饒酒深真醉狂黃河東流鴈南翔
輶車明朝歸帝鄉玉堂掖垣梧竹長題詩寄遠毋相忘
顧玉山索蟠松因登天平得二本移送賦之

昆丘好鳥來雲巖口銜仙人雲錦緘開緘讀之見深意
願乞蟠松數株翠疎雨落葉迷秋山屐齒便躡苔斑斑
龍門直上天百尺石屋徑度雲三間東林西林何窅冥
前山後山還獨經青藜不畏虎豹跡白日還見虬龍形

華蓋峯頭最高處，偃秀蟠竒逢。兩樹僕奴驚，叫答空谷。
鸞鶴翱翔入烟霧，大株倒掛蒼崖巔。小株橫欹寒澗邊。
乾坤凝結太初氣，蛟蜃飛騰千丈淵。沙土錚錚試長鏹。
險石忽崩雷電落，淒瀨含風木客嘯。深根出地山靈愕。
祝爾嘉辭爾應喜，致爾將歸玉山裡。勿愁凡卉妬清標。
珊瑚琅玕森共倚，後三千歲常青根。下早看成茯苓。
仙人服之生羽翼，他日相期遊八極。

日峯歌為昇居士賦

無愠

羲和鞭日昇扶桑殘星曉月俱遁藏出海高峯最先照
草木澆漾浮金光興來振衣凌絕頂俯覽人間同坎井
呼吸元氣融心神擺脫塵勞發深省一真之境無異同
聲聞醉酒如瘖聾安得毘耶多病翁與渠把手擊節歌
日峯

題谿山小隱圖

守仁 六首

自我初陟浮丘峯十年往還如夢中向來朋舊半白髮
只有山色當時同青檀叢邊數間屋夜夜白雲檐下宿

道人心境雲共閒
嘯傲雲林謝塵俗
橋頭野客行遲遲
歸來似有東林期
一聲清磬萬山寂
知是上方禪定時

採菊篇為鄭生作

朝采菊莫采菊
朝莫歸來不盈掬
芒鞋緩踏東籬霜
酒杯倒吸南山綠
寒風西來吹碧草
崇蘭委質湘江道
春川桃李枝亦推
只有柴桑秋色好
勸君醉解頭上巾
未必今人非古人
但令采菊不采根
一年一見黃花新

來鷗亭為姚宗文賦

來鷗道人狎鷗處東海蒼茫隔烟霧清晨開戶看鷗來
落日彈琴送鷗去忘機不獨海上人亭前日日還相親
紅樹沙烟泖東晚碧天野水江南春玉羽飄蕭弄明月
人分鷗兮兩同潔半空飛雨散秋雲千里涼風捲晴雪
人鷗相對本無情誰能更結烟波盟乘軒不羨籠中鶴
掣臂每憐韝上鷹鳳山青青落窻几九朵芙蓉淨如洗
鳴皋歌罷鷗復來一聲漁笛滄浪起

寶古齋為曹明仲作

我思古人不可作安得澆漓變淳朴夢中無復見周公
寶古名齋聊自托商鼎周彝不足珍秦碑漢碣俱成塵
今人信有古人節豈薄今人厚古人世道雖云日凋喪
管鮑貧交猶可尚北窓日午暑風清悠然高臥羲皇上
龍湫行送軒宗冕赴鴈宕能仁寺

大龍湫小龍湫青天倒瀉銀河流海風吹練白杲杲雪
花灑面寒飈飈矩那大士濯足處碧波下見長黃虬山
僧洗鉢白雲動澗援飲子蒼巖幽神蹤隱現不可測幻

境變化誰能求道人此地追昔游泠然一錫辭神州天
香飄飄滿衣袖散作雨露東南陬老夫送別歌龍湫芙
蓉花開溪水頭永嘉妙語猶可續永夜松風消客愁思
君何處寄清夢三十六峯明月秋

元故鄭泉州輓詩

練溪先生天下士身為列星名不死諫疏猶存陸贄書
正議寧論董狐史宦遊中外三十年使車所至民歡然
蘭臺挂笏朝雨後繡衣持斧春風前朝廷厭亂思傑直

五馬駢駢向南國運移元祚不可支治安有策終何益
歛城歸來歲云莫回首閩鄉隔煙霧要識行人墮淚碑
試看瓜山鄭公渡

馬鞍山

卽崑山玉峯

自恢 二首

馬鞍山西向吳東山中佳氣長鬱葱層巒起伏積空翠
芙蓉削出青天中六丁夜半石壘壁殿閣煌煌絢金碧
嚮師燕坐講大乘虎來問法作人立天花散雨娑羅樹
一聲共命雲深處我時細讀孟郊詩興來更上龍洲墓

憶昔曾同忠信友，七尺枯藤長在手。數年音問墮茫然，
頓覺饑懷醉如酒。嗟彼習俗，酣歡娛錦韉。細馬紅氍毹，
畫船吹箭搗大鼓。吳兒棹歌越女飲，只今歌樂難再得。
面顏已帶風塵色，何如張宴溪上樓。山光倒浸湖光白，
我愛虎頭金粟子，千載論文澹如水。每懷故舊參與商，
二老到門驚復喜。我留玉山今即歸，天風泠泠吹客衣。
人生會合如夢寐，焉能對酒成吁噉。我歌長歌若起舞，
山川信美非吾土。褰裳涉澗采昌陽，且向山中作重午。

題顧仲瑛漁莊

君家漁莊在何處江波迢迢隔烟霧
清秋獨釣蘆花風明月長歌白蘋渡
高堂絲管延佳賓舉網得魚皆錦鱗
小奴鸞刀出素手金盤斫鱠如飛銀
走也山林老釋子拄杖行吟嗟未已
平生雅有濠上游相思瀾瀾東流水

登多景樓

無方

大山千丈青巖堯長江萬古鋪瑤瑤
銀河倒影落天塹海門日日來春潮
偉哉孫劉輩壯志摩雲霄只今英雄

遺草木秋霜肅殺寒不凋朱闌仄上橫斗杓烟巒直下
明金焦黃鶴山空杜鵑老鴛鴦渚冷芙蓉嬌人間笑傲
輸漁樵猶將興廢論前朝萬歲嶺千秋橋月明尚有人
吹簫月明尚有人吹簫

寄見心和尚

溥照

憶昔與君相別時君能贈我楊柳詩即今搖蕩東風裏
吳山越水長相思長相思情何極矯首雙峯入天碧峯
頭玉樹好容顏安得凌風生羽翼

荆石歌

普莊 三首

荆山有石徒落落何人知是無瑕璞卞和一見喜且驚
持獻金門試雕琢楚國良工希復希可憐抱玉荆山歸
一朝剖決遇明主天生至寶真絕竒近聞荆山尚多石
於中豈有連城璧牧童棄置如瓦礫時無卞氏誰能識
舉世學道人各懷無價珍宗匠久不作未免成埋塵塵
埋不埋何得失利物應機終有日願言此去善護持休
向中途生退屈道人索我荆石歌載歌載歎可奈何荆

石懷歸莫輕售世間自古譏言多

臥雲軒為嘉禾大機禪師作

臥雲軒中人塵事不相到心與雲俱閒看雲聊寄傲雲
之從龍自可期達人應世當有時乃知舒卷本無跡六
合茫茫隨所適殷勤為告臥雲人雲中有路須致身大
地蒼生望霖雨胡為久臥南湖濱

送兼首座

八紘雲淨秋氣高風生桂岫天香飄堂中上座定初起

卷衣欲度龍江潮，再四留之不肯住。
銜錫橫肩出門去，他日重來捋虎鬚。
啐啄當機箭鋒拄，少林一曲聽者難。
無絃之琴誰復彈，老我凌霄倚庭樹。
摩挲兩眼看鵬搏。

車遙遙

道衍 十九首

車遙遙，行人心忙疑路迢。
黃塵眯目神更亂，紅雨點衣魂欲消。
車聲似與啼聲續，羊腸難比愁腸曲。
沙頭酒家不少留，匆匆碾破平蕪綠。
妾身願同楊葉輕，春風千里隨車行。

公無渡河

公無渡河公無渡河下有蛟窟上有鯨波公乎公乎罔
知汝意汝不謀蝸角名汝不圖蠅頭利胡為險津浮小
壺不肯芳郊走輕騎公若沉河死妾豈能獨生有身無
可恃有路不可行我必投河宮訴河伯執公袂附公魄
公能念妾舊時情使同攜手迴家宅寧知公公不回素
絃奏斷悲風來

公莫舞

公莫舞公莫舞沛公個儻真英主隆準龍顏絕代無三
尺清霜奮神武天命有在成大功况爾良平作臣輔區
區范增何足取瞋目起來撞玉斗世稱人傑未為公我
謂不及王陵母豈似當年屠狗人怒髮裂眦氣欲伸羸
肩斗酒快意啖但知有主忘其身公莫舞公莫舞項王
即日為亡虜秦璽來歸萬國朝六合之中皆漢主

烏棲曲

啞啞烏結巢庭樹枝去年庭樹官盡伐主人不忍烏巢

移城上月明金柝罷臨風遙望烏來歸烏不歸主應惱
非是嗔烏情義少願汝結巢田野間莫戀他家樹枝好

黃河清

黃河清洗甲兵聖人在位天下平四時氣正三光明
萬邦珍貢來宸庭邊烽不舉桴鼓不鳴家家雞犬聲
相聞奚須湯池與金城但見十日風五日雨醴泉出兮
芝草生桑穀徧野秋有成秋有成品物亨聖人子孫
萬世其永寧何以得此悅我情豈不見黃河清

灌畦老歌

赤脚科頭布為襖結束抱甕行常早去住不離溝畛間
云是城南灌畦老自言灌畦不計年衆謂卑污我為好
生平欲學漢陰人肯將機事藏懷抱朝灌西畦蔬莫灌
東畦稻出則引其兒入則隨其媪偃息還尋綠樹陰煖
風晴日眠芳草但願蔬成稻熟兩無筭使我渾室樂歲
終身飽更不念手胼胝亦不恤背偃僂瓦盆濁酒滿牀
頭共醉長從樵牧侶或有告之曰噫汝之為生也何汲

谷
八
二
卷二十
汲而營營資爾口與腹終歲勞其形古人恥同草木化
捨此亟立身後名灌畦老勉爾行豈不見李靖微時宿
龍宅起取馬上天瓢傾

題太白觀月圖

我觀謫仙非小仙胸隘八極空塵緣金鑿揮毫天子前
一飲斗酒詩百篇歸來江上披雲烟水光月色相嬋娟
橫琴偃仰蒼松邊醉看明月懸青天掀髯一笑三千年

題雪擁藍關圖

千山一片亂飛雪，藍關蕭蕭行跡絕。可憐倔彊韓退之，
匹馬度關腸亦結。嬌妻稚子無復窺，罷奴老僕能相隨。
得失於人既有命，文章驚世將何為。孰謂當年憲宗惑，
覩縷千言陳佛骨。若云佛怒禍斯人，佛也為人誠可忽。
潮陽去此八千程，冠蓋已失春花榮。作詩示姪成一笑，
披圖千載為含情。

題三香圖

湘江水寒天，雨霜梅兄。簪弟嗟同芳，當年山谷曾有詠。

趙子儼作圖三香瓊妃綽約如冰雪翠袖輕盈弄明月
江干寂莫抱天真寒影微波共清絕故山惜花埋衆草
年來零落誰能保我生已解色是空到處何曾被花惱
客邊莫謂無相知采美尋芳還自怡午窓夢破鳥聲寂
披圖一笑為題詩

山行

山前雨晴山後陰
槿籬花繁蘿逕深
燒烟無數人烟少
樵子兩三來遠林
斷橋流水不可度
落日孤猿空候吟

且停寺 并引

寺在內丘縣西山中晉佛圖澄之所建也奇峯喬林
清泉脩竹境致幽絕非他山可並昔號太子於寺駐
馬曰且停從是人呼為且停寺有碑在焉

老年落魄猶非昔破帽遮頭誰識得不問水郭與山村
杖藜到處尋陳迹西丘地勢一何壯建國當年誇石勒
竺師賴有佛圖澄問道從容降辭色至今禪刹遺礪阿
松扉晝掩縈烟蘿水流涓涓水樂奏山木黯黯山禽歌

樵人收豎不敢到竹逕雲斷惟僧過有碑千年字漫滅
忍使老眼空摩挲神僧去久山無王誰聽塔上風鈴語
古往今來一笑間不用悲歌淚如雨

折杏花一枝寄白范兼懷東鄰故友

庭前兩杏春搖蕩未到清明花已放鶴軒初訝火雲張
禪室恍驚霞綺障林深自無狂蝶戀物外乃有幽人望
爛然差勝碎錦坊丹青妙筆愁難狀去年折花寄鄰叟
今年鄰叟無何有可憐見花不見人腸斷東風遶花走

但願東風休作惡且使北人相與守一枝送爾表情親
侑花得句何須酒

畫松為相士袁廷玉賦

江南地煖松多直參天矯矯逾千尺豐腴有似富家子
膏粱養就非凡質朔方之地多苦寒蒼松下作蛟虬蟠
局促何如蓬蓽士肢體困折精神瘴蘓公此論亦可笑
物形天賦誰能料清竒古怪陋與妍達人大觀無不妙
我觀此松何偃蹇畫手渾疑董北苑挂君高堂素壁間

只恐風雷一夕捲

題趙原臨高彥敬青山白雲圖

前朝畫師那有數衆中獨數房山高房山氣勢凌八極
下筆每見胸中豪白雲萬重山萬疊烟嵐拂翠如春濤
長松落子礪走瀑掩耳不聽孤猿嗥小亭獨坐誰氏子
超然好似歸田陶人間何處得此境錢塘門外多林臯
趙君愛畫亦無匹緜楮積案寧辭勞乃知房山與神會
點綴不到無秋毫吳中名家每見畫惟有此幅宜加褒

為題長句付一笑春風兩鬢飛霜毛

訪席鍊師

杖錫出門天尚早度水尋仙秋正好道院無塵多桂花
福地有香皆藥草垂蘿縣石雲自護落葉滿壇風為掃
童顛澗水濕青衣鶴瘦秋風凋素縞道人曾悟此性空
對客不愁雙鬢皓風流豈學賀監狂矍鑠已欺彭祖老
但於到處作兒嬉那用此身同木槁瓢隨常飲似蜜醪
盤出或獻如瓜棗我本浮屠自有師疇肯空同來問道

欲將耳目廣見聞，要使心胸盡傾倒。雖然未暇學長生，
暫許從游上蓬島。

秋日遊潭柘山禮祖塔

蚤悟人生如寄耳，不計流行并坎止。只緣山水窟中人，
此心未肯忘山水。策蹇看山朝出城，葛衣已怯秋風清。
白雲橫谷微有影，黃葉墮澗寒無聲。乍登峻嶺寧知倦，
古寺重經應戀戀。潭龍蟄水逾千丈，空鳥去天才一線。
老禪寂滅無處尋，孤塔如鶴栖喬林。巖巒幃幃開豁病目。

嵐霧翠滴消塵襟燕山如此超物表下視羣峯一拳小
他年乞地息餘踪不學烏窠居木杪

白起廟

將軍廟前多古木黃沙茫茫瞋人目醜酒燒錢遠近來
千載猶能作威福當時趙卒四十萬犬羊纍纍甘受戮
至今坑土血未乾雨濕天陰鬼羣哭豪傑一時無與比
豈料後來秦失鹿等閒鴻鵠舉秋風天下紛紛競馳逐
將軍功業今何在庭下殘碑蘚痕綠古來成敗不須論

金少入人二下
卷二十
邯鄲夢斷黃梁熟

贈筆生陸繼翁

吳興筆生誰第一陸家孫子今無匹湖海知名購者多
惟有能書始能識取材妙選中山毫揮觚圓轉猶霜刀
快如饑蠶食老葉驟若巨峽翻秋濤助賢喜得中書力
稱心奚問千金直縱使材良製未工玉堂蘭蕊空名色
陸生遺我老兔毛得之貴比瑛瓊瑤嗟余好書久成癖
細寫笑作鶯歌嬌薦紳先生多刮目文章迭贈牛腰軸

今朝忽過索吟篇
筆底生花夢方熟

題江行風浪圖

憶昔絕江適荆楚
高浪觸船難著艣
黑雲黯黯北風顛
篙師魄喪惟呼天
世人知險是風波
那識人心險更多
人心對面九疑山
一笑殺人俄頃間
貧賤安居良不惡
名利奔馳有何樂
此日披圖心為驚
老年無事不江行

秋風詞送王文憲判簿

有引

如蘭 四首

昔謝景為豫州主簿
桓元遇之取箏與彈
因歌秋風

意氣殊適今文憲典簿海邑兼司征三年于茲矣秩
滿將登上選吾鄙之士獲與遊者咸惜其去歌秋風
以送之

秋風蕭蕭天地涼鴻鵠萬里高飛翔樓船起柁大江口
拔劍斫地歌慨慷我歌使君美無度卓犖竒才廊廟具
瓊林玉樹出風塵草聖江東稱獨步只今大府間雄藩
東南砥柱迴狂瀾遴選英才濟時急軍儲國賦無艱難
君來典簿上洋邑闌闌人烟漸繁殖蠻商海舶舟車通

征稅寬平足供億三年美政清無私會計之當明錙銖
百里元非大賢路錢穀瑣屑焉能羈使君使君追祖烈
籍籍清聲振冰蘖蓮華池上白晝閒拄頰看山見高節
我歌秋風歌未終酒酣浩氣如長虹丈夫志在翊王室
五雲矯首蓬萊東

大夢軒

天風吹衣月皜皜神遊直上鈞天表鈞天廣樂間咸池
八翼飛空九門杳翩然騎龍下大荒笑指三山一拳小

俯觀萬化如飛塵宇宙茫茫天地老鄭人蕉下鹿未真
謝家池上生春草蟻穴南柯二十年一枕黃梁空擾擾
傳巖夜應天子徵用汝為霖澤枯槁華胥聖化開雍熙
海晏河清濟時了高軒睡起東方明火鳥飛出扶桑曉

和全室古村民韻

古村民古村居古牆繚繞古屋廬古木深處宅一區古
民待兔只守株治生唯讀種樹書標枝野鹿猶古初教
兒學圃手荷鋤陶漁耕稼遵有虞白頭懶步青雲衢有

袴不用歌無襦山中酒熟雲滿壺持觴勸客醉且扶古
村民古村居

電珠泉為劉丹厓作

老蛟夜嚼陰山水冰花碎作玻璃聲困靈驚逃罔象走
一片青天落星斗金谷綠城春已空湘竹紅淚啼秋風
仙人剪冰不成雪電子纍纍水中結照車十二何足多
昆明魚目騰秋波烏乎魏王千金購徑寸竭海徧網珊
瑚柯珠兮珠兮奈若何

古今禪藻集卷二十

欽定四庫全書

古今禪藻集卷二十一

明釋正勉釋性通同輯

明

七言古詩

奉萱堂為陳指揮賦

大同

堂中阿母顏色好堂外青陽長萱草將軍自是平之孫
脫錦著綵行孝道彼皆有母曾莫置懷抱將軍孝養古
來少杯濃琥珀香風繞花氣薰簾春不老朝朝問寢恒

起早時時憂親髮恐皓願得王母桃安期棗奉母食之
長壽考

贈同雪岑字歌

覺澄

雲中上人號無辯筆法精微成獨善留心靜室寫華嚴
得意情窓書素練淮山買斷溪藤潁水磨穿銅雀硯
有時乘興掃蠻牋鶴舞龍飛星斗轉風渺渺兮鴈行行
雨蕭蕭兮雲片片紅杏花開畫錦堂侍臣鵠立通明殿
觀鳥欲登蒼頡臺換鷺思覩羲之面智永禪師去不逢

夢英作者誰能見同也方今超等倫操觚染翰人驚羨
索字人多日日來也須鑄箇缺門限

熊耳山

魯山

雙峯並峙青螺子因問田夫識熊耳埋履塔前人少過
山風滿壑空流水巖前野花春自開松間石徑生莓苔
山僧搏飯親畊犁相逢不說西來意

輓朱漁隱

德亨

穆溪溪上天連水颺風忽自青蘋起曉來烟雨失漁舟

金匱要略卷二十一
不見滄浪浩歌子往來泛此冷鷗盟水底魚龍猶愴情
葦杭昨夜弔陳迹一聲老鶴秋冥冥

古意

明秀
二首

黃河滾滾天上來客星獨照桐江臺漢庭老吏不復見
天下清議安在哉東家小兒富且貴春城錦衣高馬迴
落日還隨高馬去醉歌吸盡鸚鵡杯前山大雪苦吟客
閉門飢腸千樹梅千樹梅花萬年雪侍中之血賈生才
南海猶聞越裳貢市舶萬里風濤開明珠翠羽不知數

神仙窟宅真蓬萊紛紛世事皆局戲淚灑江雨江邊哀
放歌行

許由堯舜之君世自愛巖棲意任長牀前紫芝高一尺
冥鴻絕岸山蒼蒼

漁翁圖

永瑛 三首

為漁歲頗足水國魚鰕熟結網獲黃麻炊飯然青竹江
頭日出孤嶼明白鷗點破春煙綠

徐春塘過月下鼓琴談詩

律詩
誤入

山深沈沈夜漏遲東郭高人吟不歸朱絃奏落碧障月
白露浥濕青羅衣堂虛泠泠流水瀉天闊杳杳冥鴻飛
昭文一鼓妙絕世秋壇豈惜知音稀

次鄭少谷韻

律詩
誤入

西巖磬發日已暮抱杖木末悲秋陰孤鴻度海帶寒色
亂石閉門生道心風入邊城沙漠漠雨清山館竹森森
此時隱几真吾事遮莫林廬黃葉深

石橋阻雨

法聚 二首

天台之山秀拔獨萃東南竒龍蟠虎踞千態萬狀爭妍
媼丹梯鳥道不易度日高青嶂啼猿悲石梁誰斲青霞
骨斷峽如門對突兀奔濤千尺翻銀河雷霆下震蛟龍
窟曇花亭前霜葉飛拄杖踏破雲霏微聖流五百一問
訊龍宮應供歸未歸幽花怪石深澗底衲子開堂脩竹
裏烹茶為我談祕靈長飈忽送千峯雨瑤臺雙闕莫可
窮赤城華頂俱溟濛却疑天公惜造化靈氛瑞靄一卷

萬象歸鴻蒙

贈天台張水雲

偉乎竒哉天台之峯下控瀛渤上磨穹青玉樹瑤草丹
霞赤城洞府窈窕列羣仙之福庭中有人兮酌金液以
長生抱和嗇神祕元精脯赤芝兮餐石英遐轍兮道
玄扃陰惟辟易迴耀靈三花聚兮五氣凝玉壺湛湛甘
露零運河車兮降玄冥幻無心於蒼狗白衣兮形非其
形蛻何時兮朝紫清吾將策蜿蜒與驂兮送子於曇花
之亭

題松溪居士卷

果斌

霞標隱隱清且高，蓬廬小結埋蓬蒿。
雲根迸出一泓水，蛟龍噴怒如崩濤。
溪上長松千尺許，金柯翠蓋乘風雨。
凜然相對毛骨寒，直恐凌空勢將舉。
主人愛此蒼虬姿，玄霜剝擊恒如斯。
夜深明月上空宇，寒巖倒掛珊瑚枝。
松青青兮補雲缺，溪泠泠兮飛玉屑。
浮花大夢喚不醒，長嘯一聲山欲裂。

就巖歌贈海上人

圓理 二首

上人索詩來就予自言身就巖穴居巖前種竹一萬箇
巖後栽松五畝餘巖石作我座巖雲伴吾廬有時發長
嘯風生巖谷虛有時起消睡把讀般若書不知春來與
秋往亦不知混沌與太初但見西飛白日東流水飢餐
渴飲聊自如我聞此言極心賞興味蕭然毛骨爽世人
惟解朝市榮誰向山林出塵網今君年少有高志爍破
三千大千事等閒結足不下山此是高僧第一義上人
聞我言稽首至數四須彌可為塵我心永不二吁嗟乎

雲蒼蒼兮水潺潺冥心守寂兮古所難君不見蒲團坐
破說長慶榮辱無心號嬾殘丈夫立志有如此何必三
登投子九洞山

石亭歌題靈光方丈

君不見靈光之宮深且幽叢篁古木森然稠朱甍翠拱
夾道周煙霏雨蝕知幾秋又不見中間石室方丈餘五
臺峻峙凌高虛朝霞紛披紫瑪瑙夕露點滴青芙蓉南
薰五月吹我來憑之忽覺襟懷開竒形怪狀何纍纍獅

蹲虎踞皆莓苔室中主人雙眼青焚香自讀楞伽經邀
余入座松滿庭耳畔彷彿泉泠泠我昔曾移澱江棹復
後轉入天台行翻思所遇皆絕竒燦如雲錦羅天星只
今淪落歸林垆遠遊索寞心冥冥春風罷移桃竹杖明
月獨臥蘆花汀何緣此日登此亭昨夢欲醒猶未醒手
彈朱絲未終曲我吟短歌君且聽堪笑浮生如聚萍東
西蕩漾靡暫停明朝歸去迹復陳回首南山空翠屏

採蓮曲

戒襄 七首

湖南採蓮子湖北採芙蓉蓮子心常苦芙蓉花自紅青
裙翠袖輕搖櫓日暮歌聲下烟浦

烏夜村

晉何皇后歸葬于烏夜村后初生時有衆
鳥鳴于樹後選入宮當立后之日其鳥復

來鳴
其家

烏夜村邊烏夜栖月落霜天烏夜啼昔時皇后墳中樹
樹盡為薪空有墓今日名留烏夜村烏飛何處樹無存
千秋陳迹荒郊外風草蕭蕭吹墓門

春雲篇寄錢懋毅

春雲片片東南生，忽憶家人西北里。
雲光靉靆時時更，宛似佳人爛文綺。
雲兮雲兮若有心情，空化作商家霖。

吳江歌

吳江西望水如烟，青草綠波連碧天。
舟行半沒蒼莽際，人家已落虛無邊。
滔滔東流日光冷，七十二峯秋墮影。
安得吳箋百尺長，描貌太湖三萬頃。

長安壩上河道中

三月臨平山下宿，沙棠一舟帆數幅。
清晨鼓柁看山行。

兩岸垂楊春水綠岸上人家挂酒旗幾樹桃花映脩竹
路人問我將何之我欲尋師向天目

秋風歌寄錢懋毅孝廉二首

秋風起兮山之陽美人不來兮心內傷水流兮江漢月
落兮屋梁觸情寓目兮不能忘

秋風起兮山之陰望美人兮水中之遙岑白雲兮虛榻
明月兮孤琴斷鴻哀鴈兮孰離思之可任

螟蛉歌

秣宏 四首

百步回廊
卷二十一
螟蛉螟蛉何其靈得種歸來呼營營非已所生兮肯已
形巧矣乎人不如螟蛉

螟蛉螟蛉何其冥不憚劬勞兮育而嬰羽翼既成兮去
不停悲矣乎人亦如螟蛉

跛腳法師歌自嘲

跛腳法師胡以名良由能說不能行我今行說俱兩拙
不應無實當斯稱春王正月才過十午間隨例入浴室
失足俄沉百沸湯不起牀敷五十日瘡痍甫平筋力疲

左長右短行參差東行夾輔二童子西行交倚雙筇枝
是故此師名跛脚踏去跛來人笑殺笑殺平生好放生
善因善果理難合頗有市肆旃陀羅剗羊擊牛烹鳧鷖
鼈鱉蟹蛤殺無數而反康豫無纖疴放生誠有長壽理
因果無差休亂擬我昔殺業今須償身痛心生大歡喜
傍人問我喜者何我以此脚成蹉跎趨奔無始至今日
步步趁入無明窠或趨名兮據高位衝寒踏徧金階地
或趨利兮走天涯歷盡燕秦并楚魏或趨豪勢候門墻

不減立雪之游揚或趨女色越垣間由此暮夜遭傷亡
或趨檀施求無已匍匐泥塗沒其趾或趨朋友時往來
破夏踐殞諸蟲蟻或趨五嶽及三山南馳北騫芒鞋穿
所以如來苦呵責舉足動足皆寃愆幸哉今跛損成益
思欲閒行行不得潛形斂跡守林巒多種狂心一朝息
客來恕我不起延兀兀似入磨磚禪閉門無事且高枕
欲學翠色烟嵐眠祇愁此腳不終疾趨奔萬境仍如昔
願君不跛如跛人勝彼長年掩關客

雲棲積雪

有叙

雲棲四面皆山積雪之後真銀色世界也有禪者謂
今居穢土求淨邦還許出穢韻求淨偈否予可之因
出韻云狗醜韭酒紐偈畢禪者大悅合掌曰善哉誠
然乎不越娑婆是名安養

萬山無人縱鷹狗頑石高低盡遮醜
糝徧苔痕白似氈
壓翻蒲葉青如韭
寒膏時煮竹爐茶
潔體不陪金帳酒
水晶城外一聲柳
玉關頓地開銀紐

昱光道兄禮五臺還南海贈之

真一

道人今自五臺來還同昔日五臺去若言去自昔時蹤
我心不得去時處若言今是來時路我心飄飄渾無住
翹足南望洛伽山依舊洋洋娑竭海佇思六月清涼寺
塞風粟粟何曾改兩山情境俱不遷道人去住亦何言
但令心無去來想此山可北彼可南君不見昔有真人
居南嶽一鉢翛然出行腳偶然挂錫大慈山雙虎移泉
童子酒

秦淮臥雪為陳將軍賦

洪恩 二首

陳侯美顏如冠玉逸氣翩翩不偶俗代本長揚司隸班
居從桃葉秦淮曲相承石祿總世勲幼能學武兼能文
座上小山招隱士屏門大樹憶將軍里閨羣兒嘲尚白
城中七貴爭傾席左圖右籍日銜杯月下花前恒散憤
一身高臥恥競奔萬戶低眉安足論妻孥寧使飽芻粟
風雪蕭蕭唯閉門

題江舟風雨圖

金史卷之二十一
卷二十一
江雲暮暮烟雨來隨風勢卷林木推扁舟鼓柁激白浪
轉使世路相驚猜中流擊楫自朝莫咫尺平堤不肯渡
風波歷盡得魚歸柳下酣歌那知怖

古行路難二首

德勝四首

君不見東海怒濤浪如屋長江萬里千里曲疾風驟雨
只須更槿花朝露何感促人心不同有如面雌黃月旦
頻相續衛君昔愛彌子瑕甘桃遺君恩偏篤愛弛一旦
罪殘桃一桃一人分榮辱世人之交不如是裂膽輸肝

稱未足倏忽蕭朱嫌隙生絕交已廣歲風俗勸君論交
須擇交莫將輕信頻翻覆

請問交道何真宰浮雲風勢東西在憤然意氣同死生
一朝勢變零落改君不見山林寂寞交衣冠那惜傍人
掩鼻酸自言與彼忘形久忘却哀情常帶寒又不見衣
冠亦下山林客此中深欲人不測夾竹桃花滿面飛那
知方寸抽荆棘嗟哉古道不如今論交直擬斷黃金所
以魯連子真得許由心

卷三十一
青山白雲歌贈沈君

青山白雲滿太湖時名才子滿三吳時名才子聲籍籍
白雲獨往青山孤閣門風塵晨夕飛羅衣憶蓋隘路衢
沈君沈君何寂寞春去秋來詩酒娛門前問字幾人在
座中講德四子俱一家四壁徒辛苦人言沈君何其愚
沈君沈君奈爾何白雲青山滿太湖

丁酉春徵兵戍邊至秋復徵感賦

東北一戍餘十年年年士卒募臨邊春征云盡秋防汛

秋報言無春去船又徵子弟朝鮮戍別母收啼行不住
刁斗風烟晝夜鳴雪山鯨浪晨昏怒青海黃雲殺氣高
樓船大將腰橫刀生時家室重珠玉死時鋒鏑輕鴻毛
顛魁初驚欲覆船亂骨波濤誰可憐誰無父母及妻子
夢裏兒郎猶不死古來此地一尉當徵求國中那不止
廟算原非闕吾曹願夢天閻問所以安得提婆甘露漿
盡洗甲兵歸耒耜

山中夜聞絡緯

慧秀

秋林月黑雷雨度虎豹潛形谷風怒屋後淙淙響谿水
主人不眠愁歲莫風疎雨息林影交仰視明河爛如故
玉繩歷落珠斗橫豆花滿庭滴秋露更長漏寂山氣清
野寒蕭蕭蛩亂鳴花間絡緯忙不歇迢迢獨寫縑車聲
縑車聲似催人織三吳況是蠶桑國蠶多稅多苦亦多
半匹黃縑非易得空勞織婦鳴朝機織得完官生計微
家中數口嗷嗷者每到深冬無複衣自是山居情累埽
無衣不足生煩惱女蘿為帶芙蓉裳浩氣猶能劣蒼昊

祇憐日月常居諸
瓦鉢空銷巖畔蔬
平生道行亦復爾
山鬼揶揄愁殺予

任俠行

斯學九首

起跡蓬蒿下少年
意氣殊門有萬里
客家無擔石儲負
勢賢豪間任俠聞
江湖星霜一劍四
方走風塵匹騎為
長驅冠以側注言
貌類如叱令使者
伏謁自稱高陽酒
徒長事袁絲弟畜
灌夫談笑却秦楚
遊說輕張蘇寧居
傳舍長甘作朱家
奴曾捐虞卿印不
醉文君壚母在身

未許姊哭腸先屠只知漢已闢矣那顧吳其沼乎竊國者侯竊鈞者誅睚眦殺人可勝數頓令直義傾城都劇蓋已往郭解空徂信陵槐里久寂莫千秋古樹多啼鳥

四時子夜歌四首

殘花落處香成雨嬌鳥啼來日當午碧蜂采英若個甜黃蘗生心為誰苦

葵英如杯榴萼小綠樹陰陰轉黃鳥晝長深院不開門暗鑠愁眉事多少

新涼已入深閨裏
林葉蕭蕭夕風起
床頭蟋蟀急寒霜
池面芙蓉照秋水

風霜慘淡歲云暮
葉聲吹盡江頭樹
閨裏相思人未歸
寒衣欲寄愁長路

贈錢參軍元治

天風蕭蕭吹海門
壯士氣蹴秋濤奔
萬里聲名動吳越
奕葉乃是錢王孫
身過七尺廣其顙
骯髒還為百夫長
一朝拔劍起布衣
誰信英雄在草莽
生來膂力甘棄文

效武記室成叅軍幕裏高談
隆霜露帳前鼻息生風雲
驪駒五花方汗血玉鞭夜度天山雪
北飛燕塞尺一書
東下齊城三寸舌少年自與終童等
請纓欲繫單于頸
椎牛置酒饗士餘坐擁征袍醉初醒
漢關月出胡天青
黃沙綠草塵冥冥時危便欲救邊去
腰間羽箭如流星
鐵甲輝煌耀雲日勒功豈獨燕然石
麟臺不願丹青容
報國常看寶刀色男兒轉戰三十秋
莫言李廣不封侯
黃金大帶亦快意猶勝儒生空白頭

伐鼓歌

江南八月十日雨一夜水高三尺許門前巨漲連碧空
吳越人家類荆楚汀花兩岸沒芙蓉江雲萬頃開魚龍
浪傳源頭有三丈致使我鼓聲瑟瑟鞞鞞人千百走臯陶
望洋大笑空波濤馮夷或驚滄水使谷量牛馬澤若焦
浮沈世界不可說風火二輪總成劫丹雞白社厭雷霆
何事喧闐鳴未絕噫吁噫人自苦不見商羊獨足舞浩
浩懷襄憶大禹水不來徒伐鼓

玄亭歌為錢叔卿

草玄亭子澗之曲西蜀高風在空谷牀頭惟有太玄經
春雨花深庭草綠亭中主人名童烏讀書一壑心五湖
扁舟却作奇字呼溪山蒼蒼烟景殊夕陽一片清天孤

紫邏短歌贈錢幼卿

錦樹王孫字紫邏珊瑚千尺珠萬顆雲霧軒牕住海西
人物風流勝江左紫綺為裘紫綃裳天孫之錦成文章
姓名早挂玉帝旁今垂竿釣歌滄浪他年白社蓮花香

解嘲行唁友

如愚 十三首

天之困公將胡為公懷行道道未施焦頭爛額居上席
錦心繡口失前期虎嘯風生龍行雲資年差長矣得志
何時公無金玉其辭將有以解吾疑天欲成人先必困
吾道遲行非所病出頭船蚤豈終賢待價玉高始稱聖
君不見菊不落以遲開梅久香以晏發功名富貴數不
爽窮通得喪人靡察又不見自古聖賢操心危慮患深
者故遠

贈唐君平孝廉

有引

余方外人也時人皆以性氣目之衆口爍金君平獨
中流砥柱可謂好惡必察賦以贈之

桃花非紅李花非白泰山最低滄海最窄是非自古無
真人情安可皆得君子立身比松柏歲寒方見其節千
古前之君子千古後有君子而惜千古前之小人千古
後有小人而則前君子元不為後君子立心後小人自
然學前小人喪德胡為乎今昔懸殊利害同轍鑿池貯

水天上來月況我與君同時異路肝膽相結丈夫昂藏
七尺軀既非婦女焉能事人以顏色位高侯王有時盡
千秋萬世此念終難滅

駱台晉禮部見過賦見獨篇以贈

舉世貴耳賤其目始媿終讐何反覆君不因人喜怒生
取舍從心須見獨有人殺我借君手君持干將如木偶
有人榮我屈君過君不昂言奈若何鐘鳴忽然山亦崩
水流火就偏相應君豈不知位自尊君豈不畏世人論

頓忘名分甘如此，俾余九死難酬恩。君不見士有道，益
無親。列子居鄭四十年，闔國視之如常人。又不見理有
合形難間，龍光漫射斗牛墟。張華獨識豐城劍，以斯相
知重。古今報君何事感，君深更願君知人。似我天下之
士為君擒。

贈別劉毘耶二首

心不是水時流，無佳言不是絲。日結無緒形，不是膠父
合固難。路不是箭去，何容易可憐。殺人功名刀利安得

女媧補天手執彼祖龍驅石鞭杖此無情長江水停我
離人欲去船

謂天長舉頭見謂地闊動足踐愛者恨不多積如錢憎
者恨不速滅如電岸留水不留蜂戀花不戀一口刺腸
鍼難穿分手線

采石弔李太白先生

言不奇不足以贈先生心不同不足以名後進媿我乎
釋子弔先生乎玄聖何遭時乎靡臧遇力士乎善諧不

怨天而尤人敢安心而聽命前席宣室授簡梁園調羹
賜錦異代同恩伯陽函谷方朔金門宮中蜀道同心異
言辭不枝分性亦閒不居廊廟即深山百年窮達皆歸
盡何似名懸天地間磯頭流水聲潺湲亭上清風日往
還不辭濁酒邀明月吾將與爾破愁顏千秋萬世誠知
已我何曾生君何死江山畧無古今殊願君心地常歡
喜一代文章有數竒清新豁大敢相師孤帆明日別君
去萬里烟波無盡悲

舟雨濕書行

半年旱魃偏難雨一月淋漓不住滴
詎止壞却函中經腹裏藏書亦打濕
蠹魚膠股嘴難伸我不干天天害人
湖田水漲秧成梗山稻溪衝化作塵
前日求雨今求霽上天何意苦斯民
民家無食但忍飢官家徵賦何能支
若使今秋再無登天下安危不可知
我願皇天開其目雨暘時若成生育
不惟蒼生性命全使我經書有處讀
天不開言意已白誰教子行遠作客
經書固用好篋裝

行李應須付安宅疎慵不謹太頑鈍爾徒舟師兼有責
年登非登天不知盈虛消長民自索君不見縱使饑饉
十分荒良田好米豪家得又不見一字不識市井徒終
身富厚萬事敷經書千卷胡為乎

宿赤壁弔蘇東坡先生

勝地無名賢如富而鮮貴雖有萬不同終難敵在位名
賢乏勝地如龍而絕水民雖苦熯魃雲霓馬能起赤壁
山水甲天下得君出此高聲價當其漢末三分時吳魏

雖王皆權詐眼前富貴等浮漚萬古奸臣賊子罵曹為
鬼孫為鼠盜竊豈直一坏土君似魚臣似水官府分應
為一體荊州何嘗屬爾曹償假為言誠無恥笑鳳雛與
黃蓋小兒計誘阿瞞敗悲周瑜小器量不共戮力復許
昌及死翻嗔怨生亮噫危乎幸哉操兵百萬歿江南彼
時身死應無地敢留一旅守襄陽僅存性命何姦計疑
爾赤壁遠視未真類丹砂分難以點金似臘脂分不可
絳脣信爾赤壁近如烈火復似朝霞霞匪赤城火實鑿

金瓶梅詞話卷二十一
兵普天王土必也正名君為宋吏我為明僧君不知我
我胡慕君賢矣先生聖矣先生千秋俯仰江漢含情

贈郭仰甫山人

居家不耐貧翻樂在風塵妻子苦顏色相對愁殺人友
朋歡杯酒適意且忘身天地雞卵中何論疎與親君不
見百里奚爵祿不入心飯牛而牛肥又不見越石父寧
甘縲紲辱不受知己侮穆公晏子果何心千載令人淚
如雨

孤帆行留別齊安諸友

青天雲斷寒江駛頃刻孤帆即千里怕聽當風塞鴈鳴
愁看背櫓暮山紫我豈無情如流水我豈有家暫別此
却辭故國等蘧廬却望他山當桑梓江樹織烟凍雨外
村燈刺影寒波裏老媪穿籬索放雞呼奴更宰過年豕
人之歲月愁兼盡我胡風波路未已東漂西蕩踰梗萍
夜止朝行媿螻螳況復徵稅塞眼前廣陌長衢皆荆杞
人生天地幾何時忍使身心纏憂喜安能有翅飛上天

脫此區區業傀儡

湯霍林太史招過天界寺看花是日大雪賦花雪

歌贈之

今日望新春明日望新節
新春無花看新節太寒冽
綠柳嬾伸眉黃鶯慵調舌
太史有高情招我速歸客
過寺看花開無花且看雪
竹壓幾箇低簷溜數針
綴人情不在花與雪
但喜相逢便相得
君不見洛陽萬頃好春色
又不見梁園授簡榮何極
只今花雪似古人
古人那見

今時春明日視今今復古人生歡會是良辰花雪何容
詢

贈蘊輝通公

萬鈞之弩不發鼠千金之彈不擲雀所失者多所得少
丈夫由此重然諾泰山尺土寧辭加滄海杯水寧辭杓
顧君苦志在千秋浮名恥與時人角君不見豫章之木
出土七年人不知一朝價直傾山嶽肯使猿狙之便來

繩縛

養疴張襄城進士館中紀贈

長安六月臥病者喘息呻吟似難也往日交游豈不多
誰肯相憐過車馬山東豪士張平子昔年與我盟生死
今日新承天子恩富貴不忘言獨履視我將危憐我
貧不啻與我同一身驅奴呼馬迎官舍請醫診脈何情
親勸我莫作詩動心神即疲勸我莫寫字舉筆恐傷氣
自爾為僧出方外爾常率性招人怪唾罵恨不頃刻死
今日爾病人皆喜我不愛君才與名憐君身死快人情

幸有藥餌可相扶不須干謁長安人我聞此語甚於醫
參苓藥朮馬用之著衣起立如平時始知人世貴相知

秋日江上留別李長蘅

性燭 三首

今日與君行空山白雲多變更明日與君別江上蘆花
夜如雪念子情何極與爾聚談整十日我行不苦江路
長苦君器用深難量時復與君論今古縱橫變化如義
虎反覆與君尋道藝字字具挾風霜氣久已不見此輩
人風骨稜稜鶴並清不獨令人且快意使我耳目俱開

明

送徐吏部江上遇雨宿冥州

江天昏黑風雨驚
艤舟就岸燈火明
是誰百代揭肺腑
感君此夕傾生平
少選波光射水側
村烟籠月半珪色
坐深襟被時欲眠
蓬雷滴瀝難寢息

松下歌

綠竹陰陰萬山裏
一菴正落窮巷底
翛然白晝門且支
六月無風涼漸起
米不珠兮薪不桂
盤餐不用鱸魚膾

飽餐橫眠松樹根過眼浮雲富與貴胸次畧無雜毒擾
目前光景誰美好要使進寸反退尺得多不如反得少
東坡先生惠州日嘗道石壓笋斜出那知愈抑道愈昌
千百年後見得失世衰道微人蔽惡蓬蒿妄植垣墻鑿
任他春瘦與秋肥坐斷石頭城一角

春山吟送自南上足

明曠 四首

春樹龍蓀色如黛扶疎掩映春山外春山萬疊上接天
山雲一帶飛成蓋空翠陰深澹濕衣送君去去入崔巍

金... 卷三十一
千迴百轉杳無跡惟是春山滿落暉

聽鶯曲

柳陌氤氳翠欲滴風光駘盡人情遠春鶯昨夜度江南
便向窻前弄幽寂柔情宛轉襟哀絲復似山陽吹短笛
高颺行雲駐赤霄輕邀落落蕊過山壁綿蠻覲睨殊可聽
松齋竹屋夢初醒徒倚閒馮白日盡搯頤妙入九天青
及見秦吉了曾聞鷓鴣語何如鶯囀清如許自謂知音
吾與汝

公無渡河

公無渡河公聽我歌伊知有已靡識有他風波滿眼不可說說之雙淚徒滂沱河不可渡以此故公欲渡河奈爾何

看花行贈吳明府

江城如斗烟光暝珠林繡薄啼鶯滿萬戶千門夾道開春光零落無人管吳家夫子丈人行花前宴客闌華堂意氣欽竒失今古直將天地問行藏名葩竒種世故少

翠縠丹綃何窈窕揚州當年浪得名傾城一醉吳天曉
吳夫子愛爾達日月瞬息五湖闊汝挾長鏡我一鉢便
可栖遲老林樾

秋日一雨潤兄還洞庭賦笠澤歌送之

法杲 六首

秋風生白波欲別奈情何乃兄詎是瓶中鶯金言倒瀉
如懸河髻亂相期弄糟粕擔簦負笈廿載多願君別路
無蹉跎為君試吟笠澤歌笠澤周遭三萬六千頃中涵

七十二朵芙蓉影澤心兩朶稱最高摩青插紫殊岩堯
上有蒼茫不盡之雲霄下有接天瀲灩之波濤崩濤如
雷搥山麓無風白日為之號澤國荒荒怯看日蒼茫天
根萬點墨詰朝日出煙浪平無數鼃鼃曝衣立極目四
涯無盡時蝦蟆蚪蚪那復知蛩天墜地成一色吞雲吐
霧含竒姿三洲迴盤繞其瀨三洲人家寒不耐千門萬
戶玉嶙峋一片鴻濤是襟帶寒潮散作朝暮雷喧轟激
山山欲頽雪片橫空大如笠浪花翻翻從天來馬牛無

分涯涘失潢潦蹄涔竟何物此中不盡鯨鯢淵亦復不
盡蛟龍窟宇宙因之喪中外萬舶千艘眇如芥坎然俛
首視坳堂杯水區區孰為大鴻蒙沉茫靡不容映空倒
寫飛禽蹤縱使秋毫莫逃影淳淳下鑑雙青峯雙峯東
西互爭色東之不及西之碧東峯之色向晚青西峯之
碧千雲出此峯何來一枝沙十塢廿塢何崕岢陰洞常
懸六時雨陽坡十月皆桃花灣裏人家只通水人聲沸
在烟雲裏路人白晝鬼挪揄紺木陰森挿天起查梨橘

柚土所宜家家丹實懸青枝二月平空滿山雪令人却
憶梨花時臺榭參差對相峙男三女四猶成市犬吠雞
鳴隔水光武陵之源只如是澤何溶溶峯何宵人物詎
宜清且小澤何混混峯何幽人物詎宜輕且浮澤峯空
洞兮則龍蛇以之賴人物褊窄兮則形影為之愁吳天
木落風颼颼值君振策還角頭角頭之灣碧崑上湖山
況復兼清秋溪溪蜿曲塢塢藏神人角里曾韜光君復
思歸整香刹此時橘綠橙初黃大塊要之一培塿勿厭

蓬廬窄如斗人傑地靈古所稱到日香風滿牕口如爾
肺腸應背時蕭疎自是水霜姿戶外寒松翠欲滴時來
以手摩挲之舉世而今尚狙詐獨絃之琴衆皆訝結綠
懸藜不值錢鼠璞囊藏待高價裹足尚期吾道存蘭推
玉朽無須論不願青山有人影直看麋鹿上柴門蚌坼
珠輝寒電射琅函瀾翻自朝夕有情轉語無情聽山中
儘有山中石虛空在目湖在天有時得魚還放筌挂起
山牕碧巖上浮雲看足枕書眠鵲坐頭顱虎盈砌懶殘

老人意迢遞天邊三下紫泥書鼻底蕭蕭挂寒涕佛祖
臨門勿相擾瓢笠爛將琪樹杪窻際纔通白日光階頭
直使生青草太湖澄影秋色開以之滌腸兼澣顏牙籤
墮地不復拾五千梵筴如等閒秋毫凡心悉堪嘔顛履
將支木烏有當念西來五葉禪宗風掃地君知否勿笑
杞人空戴憂午夜寸心牢制猴昔人不負苾芻相晨朝
對鏡三摩頭狙公賦芋狙空喜莫投羶氣來羣螿古今
萬事天際雲世態浮沈亂漚耳魚枯鶴鍛毋怵惕人貴

自
卷二十一
泥蟠與壁立咳唾不成龍領珠金星混沙終可惜此日
看君歸故廬令人躑躅還踟躕眩目余沈永嘉市枕鋤
君發左溪書笠澤何澄渟雲峯况縹緲壁觀巖之阿清
霜滿懷抱而余亦欲尋孤島未必榮名以為寶朽然魏
瓠何所庸畢竟青山白雲老

漁父歌

此翁平生烟水涯牽風載雨船為家水烟蒼蒼天盡處
欲減不減孤篷斜鳴榔打船江窅渺向妻亂叫蘆花好

紫網迎風牽綠泥有魚無魚和荇倒菰蒲接天水鳥飛
草深沙暖魚蝦肥日黃江黑風始怒猶自放船迎夕暉
魚鰕雜倒呼兒檢謂言趁此斜陽暖腰間剛剩十文錢
沽酒不辭青旆遠孤舟每牽江色留爛破衣裳江影浮
老漁無機鷗可驗有時飛上渠儂頭節螺簞蛤生活罷
黃頭晚梳綠烟下賣得糠鰕買得鹽鼈眠自謂心無挂
夜則慣挨江鷺眠篙橫萬朶秋峯邊明月為燈照江口
江高露冷芙蓉鮮或鰕或蚌撈江底官徭不差私自喜

所愁只恐市城饑爭道魚鰕不如米舴艋低回蘆葉鳴
沙高石短潮頭橫小兒落水大兒叫舉頭一片秋江明
狂歌亂拍十指齊葉舟總着烟溪迷白酒黃漿醉飽後
眼眶便覺青天低赤身不怨貧如洗渾家團圞一船底
月落烏啼鬼火明枕頭橫在霜花裡彌空紫沙烟浪平
渡頭誰家雞犬聲開篙一陣榔板去半夜海紅天日生

春日間居二首

誰家牆頭春色濃低枝婀娜捎春風誰家落花太輕薄

朝飛暮飛打春郭枝空鳥寒都不啼只此春風亦蕭索
昨日冶容今日惡人生恰似花開落

夕陽微茫斷橋暮菴外何人問歸路鳥啼花落春復春
江山風月無間人情間直覺遠山近雲到自然眉宇新
烟蘿蕭蕭滿春谷山前芳草春復綠峭風猶急春尚寒
幾樹綠鶯啼不足啼鶯却喚春草醒如此茅菴怯春冷
溪橋橫綠不渡人溪口桃花臥橋影花枝並笑雲欲然
杖頭雲破留青天好山一步一回顧千巖萬壑今眼前

山頭雲松際色早晚對君君未識淳于夢王質柯點君
不省如君何朱顏有時還不酖君不聞踏踏歌

辟鼠篇

策策復策策鄰翁夜辟鼠熬熬不顧枕邊夢劫劫守此
囊中米囊穿事猶可米欠飢殺我不聞太平天子恩如
沐一朝頓發紅腐粟豈唯鼠子腹便便鄰翁枕頭睡新
足聖恩如澤溢漢流川聖恩如火曝殺蒼天

題學公雲山圖

有引

余鬱沃洲之思有年緣銅臭不足不果適過學公別
峯精舍展樗仙所畫雲山圖見其重峯蔽天松影在
地白日澹蕩溪山宵冥恨不能墨化飛入因書荒唐
若而語于卷杪輒不禁垂涎朵頤之態學公無蠢我
為

山不深山得深山深馬蹄尋不尋雲不濃雲得濃雲濃
有路無西東寄語時人且莫入野牛蒼兕愁相逢山深
雲濃既如此況乃雲松挿天起中有茅菴翠可憐青山

半落柴門裡我懷青山如故舊七尺蓬廬未曾構今日
因看畫裡山不覺烟雲濕衣袖尋溪問樹亦有年鞵頭
半破蒼苔邊挽著烟蘿死不放買山那等囊中錢君不
聞匡山瀑布銀河落玉練奔騰挂天角五老香爐亦太
竒得似而山翠成幄又不聞峨眉削出青如許熊耳巖
颺入粳米得似而山秀十倍青天白日飛紅雨茲山何
名殊窅然別無峯影齊其肩屋上閒雲樹頭月枕流漱
石宜枯禪聞君菴別峯別峯未甚好海潮日夜濕青襖

紫鹿蒼猿月一來上恐巉巖欲崩倒君母挂君地吾將
整吾廬銅錢不足興有餘倘得雲山翠彷彿十年硯礪
都銷除山深雲濃差可居廬成有字煩雙魚

贈張武陵

廣化

昔人家住桃源中桃花爛漫開春風子孫奕世不知姓
但聞雞犬來雲空君今家住海西邑亦號武陵淺開宅
古人今人雖異時臭味於君真彷彿疇昔邀我梅溪頭
漁郎握手歸同舟秦時不塞漢時路山翁肯把山僧遊

金剛經卷之三
卷二十一
只今世路多草草行脚天涯漫悲老不如杖策歸巖耕
天地與君同浩浩

送禪友還天台

大泓

赤城道人迴風格短髮蒼蒼雙足白何年葦折過長水
今老思還華頂石駕湖緇素聞皆驚孤征一鉢寒雲生
行色難將垂柳縮山靈久擬獻花迎應知直上碧峯側
虬松瓢挂青天逼烟霞聲價讓君先桐栢飛泉許共適
嗟余未得與同遊白雲遙望空相憶

吳趨行送涵輝與叔祥之吳門

通凡二首

寒風百里金閶門故人泊舟日欲昏水店小兒喚沽酒
燈火射波波影翻此時憶君一扣舷欲歌未歌意茫然
婁江水深莫可測忠魂已沈千百年江水東流不復轉
屬鏤血腥碧於染可是英雄淚未乾至今濕雲不曾斂
寒山古寺鐘初下何處人家歌子夜簫聲緩續歌聲來
總有鄉心一時罷姑蘇臺上號樓烏要離墓前草色枯
酒酣那更惜今古舊業君家范蠡湖范蠡曾經霸東越

吳宮粉黛今銷歇，須臾吳越誰興亡。君自推蓬弄霜月，
錢抑之夢華齋歌

業識本無據，摩尼混其中。雖有五色光，却與塵勞同。世
人作事如夢寐，五欲六情恣遊戲。君獨夢把蓮華經，想
曾親受如來記。醒而憶之境未迷，是耶非耶靈山歸。爾
時遂能發深省，蓮華滿前香欲飛。浮生那得如夢境，六
十小劫彈指頃。便能手書如是經，受持讀誦無暫停。如
寒得衣飢者飽，迷悟由人豈草草。知君已悟業識空，諸

佛元與凡夫同我欲問君君可答心與法華同與雜若能如是轉法華此齋無異多寶塔

張善之過山居度強仕年因而嘲之

如能

紅顏居相位今子身似老白髮始為郎今子年尚早嘔心非不苦典論還精討臨水面山共幾秋松風桂月又淹留丈夫會應有知己百鍊終非繞指柔

擬秋風歌

斯德

秋風蕭蕭兮雲冥冥大塊噫氣兮萬竅鳴猿狙失木兮
山鬼驚沙石飛颺兮巖巒傾披梧楸兮推高柯盪溟海
兮揚洪波深林晦兮霖雨多時卉不芳兮歲蹉跎心怍
怍兮愁臥疴

胡郎歌

方擇 二首

胡郎於世無所欲顧我時時話心曲乃知自是竒男兒
肉眼相看詎能局芳溪曲岸千花開見君與客登春臺
秋水長空明落霞見君與客浮江槎三餘閉門曰誰伍

蠹魚為侶攻五車緯地經天學業就肯在人間一求售
即使徵書下紫霄此意還同雲出岫舊游滿眼輕肥多
獨向程郎旦暮過程郎實似金蘭者為君吐吐奈君何

江干玩月作

丹楓夾岸柳塘轉風動萍開秋水淺萍開水淺芙蓉鮮
涉江欲采心悠然白石灘頭夕烟歇月華皎皎當我前
舉頭見月懸青天褰裳撈月深在淵此時令我不能去
乍行乍止忘歸處雙艇吳歌浦口回驚鳥夢斷蘆花暝

蘆花一片露光寒積雪凝霜月下看江水溶溶沙皜皜
幾人愜意到江干

寄贈王伯穀先生

佛引

王君絕代文章伯豹隱吳門鬢將白詞賦遙凌楊子雲
風流不讓陶彭澤豈無尺穀干明主獨擅騷壇執牛耳
南州屢下陳蕃榻東海曾飛魯連矢大雅芳名時籍籍
中原作者多辟易買舟載鶴每同僧拂簡揮毫長對客
考槃聞在闔閭城水石陰陰入漢清滿徑黃花秋浥露

映門楊柳暮啼鶯
顧我空門屏蹟久
紫苔碧蘚滿窓牖
靜裡傳聞鶴駕來
幾度攜筇候江口
江口寒烟數千尺
濤聲晚落魚龍宅
天際真人不易逢
長空望斷吳山碧

秋日同朗初師休明空波西來過楊伯翼先生脩

園

圓復

歲序未云暮
風烟淒以秋
羲和馭轡一何駛
感時買棹城南游
城南烟雨徧
林黑蕭颯寒聲滿
蘆荻鷺濤上
播碧空低走石飛
沙怒相擊
須臾天霽白雲淨
夕照明霞

兩輝映山色峩峩列翠屏波光閃閃開金鏡拂拭蓬窓
度柳隄楊園只在萬松西衡門數畝環村僻茅屋三間
傍水低逕入陂塘分畫閣橋連竹樹繞晴溪陂塘竹樹
日增茂萍葉菱花漲寒溜寂寞無由覓主人淒涼不忍
窺虛囿主人停殯草堂陰水蓼秋風猶至今太息浮生
同石火典刑空在誰知音幸有慧師稱夙契門墻自昔
推高弟雅誼難忘北海尊傷心共灑西州淚歸到山窓
動暮鐘琉璃靜挂碧堂空悲懽感慨非吾事大塊誰分

吹萬風

九日風雨

如曉
二首

去年九日登天台華頂峯頭菊未開今年九日寄西湖
寒塘菊老成荒蕪千山萬山妬風雨湖頭橫艇無人呼
陰晴人事不長好貧病緣愁客中老瓦鐺煨芋就菊花
竹裡分泉自煮茶遙憶白衣人不至滿塔落葉送年華

霜蕉吟

南窓四月葉初長主人對坐懷幽想影落風前舞袖翩

聲傳月下珮環響
擗醉頻開甕底春
興來招客同歡賞
七月八月秋風驚
虛堂夜半颼颼鳴
此時主人不耐聽
歌窓寂寞難為情
九月十月霜霰欺
庭陰葉亂高低枝
離披對客不堪掃
主人多半成懊惱
紛紛且將世念屏
朝晴暮雨隨枯榮
昔日今時同此聲
主人慎勿欣惡生

夢歸省母吟

并序

文貞 二首

萬歷乙巳秋旅食密印寺
際公房時夜篝燈獨坐涼
風颼然淒雨驟至神度爽
然長吟半夜燈前十年事

一時和雨到心頭遂隱几而臥輒夢歸省母焉慨人
生夢也何乃夢中又夢耶母子形影也本不相離今
既相離彼此憶念遂深成此夢中之夢也特不知子
夢感母歟母聽子夢歟得非銅山西崩靈鐘東應者
耶鶴鳴九臯其子和之者耶噫難辨矣聊紀之云

孤客心悠哉悲風蕭蕭西北來木葉脫落掩古甃棲烏
啞啞號更哀打窓墮瓦雨復急一榻一燈坐嗚吧奔走
年來雞骨立大塊茫茫百端集憶昔辭親事遠游屈指

星霜十二周生平所志俱掣肘我獨胡為多愆尤恍兮
忽兮神情動隱几魂交入長夢冥兮漢兮雙足重馳驅
道路生嗟痛引領瞠眸瞻故丘荆榛藤蔓槿籬幽童時
戲插蕭疎柳映水垂堤引白鷗攀枝執條稍竚立若欲
對我言其由棄之轉入茅堂去忽訝慈闈雪滿頭欲言
不言顧我泣吞聲涕泗橫交流交流涕泗揮不及覺來
愴惘空沾臆鳴鳩在桑子在棘嗚呼痛之使人歎息復
歎息


蓬萍篇

將子且莫喧聽我蓬萍篇朝看土垣上飛蓬暮覽長河
裏流萍流萍鮮根蒂隨波宛轉如聚星飛蓬羽翼無風
吹搖颺之何途嗟哉乎人生孟浪亦如斯奔南徂北况
多歧不知時有定期噫吁噫星霜容易變華鬢鏡中
替若綫世間哀樂屢推遷胡為乎尚陟險踰巔蓬萍篇
心纏綿

米珠謠

法杲

穿貂一負薦十坐不臥朝難夕墊草尚連根人不期生
色厥倉入萬委積成千販夫高枕餓草思烟吁嗟乎今
日之日乃復丁此嚼珠之年噫吁嗚呼天乎人乎



古今禪藻集卷二十一